

lieu nous trouuâmes vne mine de fer. Il n'y a ancrage que pour des chaloupes. A quatre lieux à l'ouest surouest y a vne pointe de rocher qui auance vn peu vers l'eau, où il y a de grandes marees, qui sont fort dangereuses. Proche de la pointe nous vismes vne anse qui a environ demye lieue de circuit, en laquelle trouuâmes vne autre mine de fer, qui est aussi tresbonne. A quatre lieux encore plus de l'aduant y a vne belle baye qui entre dans les terres, où au fonds y a trois isles & vn rocher: dont deux sont à vne lieue du cap tirant à l'ouest: & l'autre est à l'emboucheure d'vne riuere des plus grandes & profondes qu'eussions encore veues, que nommâmes la riuere S. Jean: pour ce que ce fut ce iour là que nous y arriuâmes: & des sauages elle est appelee Ouygoudy. Ceste riuere est dangereuse si on ne reconnoist bien certaines pointes & rochers qui sont des deux costez. Elle est estroicte en son entree, puis vient à s'elargir: & ayant doublé vne pointe elle estrecit de rechef, & fait comme vn saut entre deux grands rochers, où l'eau y court d'vne si grande vitesse, que y jettant du bois il enfonce en bas, & ne le voit on plus. Mais attendant le pleine mer, l'on peut passer fort aisement ce destroit: & lors elle s'elargit comme d'vne lieue par aucuns en-

PAGE OF CHAMPLAIN'S NARRATIVE WHICH ANNOUNCES
THE DISCOVERY OF THE ST. JOHN RIVER.

(About two-thirds the original size).